

BARIO DI BRAZIL Y HENTER ARUBA A UNI PA DUNA HOMENAHE NA NOS MAMA DI CULTURA Q.E.P.D.



STA. CRUZ -- Diasabra atardi bario di Brazil y henter Aruba a uni masal pa duna un yiu di tera, un baluarte di nos cultura, sra. Bernadina Growell q.e.p.d. su merecido homenahe. Esaki a keda ORGANIZA den cooperacion entre comision Bernadina Growell, Centro di Bario Brazil, Fundacion Pro Cultura Arubano Y pastor di Brazil.

Pa 5 or, despues di bendicion di pastoor di Brazil, Jairo Maduro, a tuma lugar desvelo di Caya Bernadina Growell cu lo inicia desde pariba di misa di Brazil te comienzo di Rooi Master. Diferente dignatario a honra famia y e comision cu nan presencia y por a scucha speechnan di Ministro Presidente, sr. Mike Eman, ministro di Cultura, sra. Michelle Hooiboer-Winklaar, director di DOW, sr. Jossy Figaroa y Mervin Wyatt-Ras den nomber di Comision Bernadina Growell. Tabatin diferente presentacion di Cecelito Lopez cu Himno di Aruba, presentacion di Sodo y Cuero cu e diferente cancion di Bernadina presenta door di ganador di e festival di Bernadina,

sra. Betty Werleman. Tambe sobrina di Bernadina, sra. Lucia Thiel. Sunrise Dancers a presenta un baile. Fatme Rigaud y Jhon Freddy Montoya a presenta un bunita baile acompaña pa Sodo y Cuero. Un hoben di school Caiquetio Andy Eloisant a declama un bunita poesia encunto mama di cultura. Mc Randy Maduro a haci un bunita trabao presentando un y tur pa e atardi ey. Por a nota presencia di Vice Presidente di Parlamento, sr. Chris Dammers, diferente Parlamentario, ministranan, hefe di departamentonan y nos tata di cultura, sr. Padu Lampe. Tambe meneer y juffrounan di school den bario y tambe rumannan, sobrino(a) nan di Bernadina y tambe famianan di Cecil Growell (esposu di Bernadina q.e.p.d.). Despues di e desvelo a pasa dilanti esnan presente un tremendo parada di agrupacionnan bisti cu trahenan tipico. Tabatin un di e gruponan bisti cu trahe di antes di hendenan cu tabata biba na Brazil. Diferente grupo di Baile a acompaña tambe e parada aki

cu a pasa den bario di Brazil, Mabon, Noord Cura Cabai y finaliz'e na Centro di Bario Brazil. Aki pueblo di Brazil y Aruba a ser agradablemente sorprende cu presencia di nos gobernador di Aruba kende a inaugura un exposicion di obranan y logronan di Bernadina, bao encargo di miembro di e comision Mariano Bermudez sosteni pa John Freddy Montoya, cu cooperacion di varios hoben den bario y di school EPB di San Nicolaas. Promer cu inauguracion tabatin presentacion di nos gran artista arubano Sharon Rose cantando un cancion di Bernadina y grupo di baile Masiduri a inicia apertura acompaña door di grupo Sodo y Cuero. Despues a sigui presentacion di diferente agrupacion musica manera Nos herencia. E cantidad di personanan cu a bin presencia tanto e desvelo di e caya, e parada y exposicion a surpasa tur expectativa y e comision a keda masha contento y honra cu e aprecio grandi cu no solamente Brazil y vecindario tin pa Bernadina sino tambe otro partinan di Aruba.